

# Powšitkowne WOZJEWJENJA

njedźelu, 17. nowembra 2013

## Přeprošenje na Mačičnu akademiju

Dr. Jens Buliš, teologa a cyrkwiniski stawiznar z Chrósćic, změje štwórtk, 21. nowembra, w 19.30 hodź. w Budyskim hosćencu „Wjelbiku“, Žitna 7, přednošk k temje „Mišnjanska a Hornjołužiska załožba za chudych Serbow. K 300. narodninam jeje załožičela Jana Michała Budarja (1713–1789).“ Přednošować budže w němskej rěči. Zastup je darmotny.

## Hromadźa hodowne dary

Towarstwo swjateje Filomeny z.t. chce tež lětsa džěci a swójby w čěskim Jiřetínje, w bołharskim měsće Razgradže a wokolnych wsach z hodownymi pakćikami zwjeselić. Jich wobsah njeje předpisany. Móžne pak su na přikład kakaw, slódkosće, wosušk, hrajki a pisanski material. Derje by było, by-li na pakćiku napisane było, za koho a w kotrej starobje wón je. Wotedać móža so pakćiki wot póndžele do štwórtka, 25. do 28. nowembra, stajnje wot 17 do 18 hodź. w Smjerdžečanskim kulturnym domje. W tutym času přijimuju tohorunja derje zdžeržanu drastu, črije, počehnjenja a hrajki, kotrež měli so do kartonow spakować. Dalša móžnosć podpěry su pjenježne dary, z kotrychž ma so transporter za wjacore džěćace a socialne stacije kupić. Nadrobniše informacije k lětušej hodownej akciji Towarstwa swjateje Filomeny poda předsyda Gerat Róbl, telefonowe čisło (03 57 96) 9 65 40.

## Chrysta Krala w Chrósćicach

Na swjedženju Chrysta Krala, młodžinskej wuznawanskej njedželi, 24. nowembra, je w 14 hodź. w Chrósćanskej cyrkwi nyšpor, kotryž wuhotuje němski młodžinski chór Effata z Kulowa. Nyšporej přizamknje so swačina kaž tež paslenje adventneho kalendra na farje. Dekanatne dušepastyrstwo młodžiny wšitkich młodostnych wutrobnje přeprošuje.

## Kreatiwna džěłarnička

Na paslenje adventneje pychi přeprošuje dekanatne dušepastyrstwo sobotu, 30. nowembra, wot 13.00 do 17.00 hodź. młodostnych, maćerje a dalšich zajimcow do Don Boskoweho domu we Worklecach. Kóždy ma swój předžěłany material zapłaćić.

## Zetkanje samostejacych

Samostejacy ze serbskich wosadow su na zetkanje wutoru, 10. decembra, w 14 hodź. do Domu biskopa Bena w Smochćicach přeprošeni. Zajimcy njech so hač do štwórtka, 5. decembra, w redakciji Katolskeho Posoła přizjewja, telefonowe čisło (0 35 91) 55 02 12. Štóž chce wotewzaty być, njech to prošu zdžěli.